



9. september 2021

UPA 2022/173

Inatsisartut suleriaasianni § 36 naapertorlugu apeqquteqaat aallaavigalugu oqallissiaq imaattoq matumuuna saqqummiuppara.

Qanoq iliornikkut eqqumiitsuliornermut isiginnittariaaserput kulturiinnarmut sunngiffimmilu suliassannartut attuumassuteqarunnaartillugu, annerusumik inuussutissarsiutitut akuerisaanerulersissinnaanera pillugu apeqquteqaat aallaavigalugu oqallissiaq.

(Inatsisartuni ilaasortaq, Aqqalu C. Jerimiassen, Atassut)

Qineeqquaarnermi kingullermi Atassummiit suaarutigaarpot nipilersorneq eqqumiitsuliornerlu annerusumik inuussutissarsiutitut periarfissaasariaqartut. Taamaattorli inuppaaluit oqariartuuterput quianartutut tiguaat, allaallu aamma qineeqquaartuniit quiassuaataalluni. Qanoroog aamma sunngiffimmi suliaq inuussutissarsiutaassava nunatsinni? Sinnattuaqineruvorroq.

Sooq sinnattuaqinerussava, sunngiffimmi suliassatut isigisaq inuussutissarsiutigissallugu? Nipilersortartuinnaammi assersutigissagutsigit, Savalimmiuni inuussutissarsiutigalugu nipilersortartut 70-it missaaniippot. Aali 50.000-it ataallugit innuttaasulik. Uagut nipilersortartugut pikkorluppallaarsimassappat? Naamerluinnaq. Immaqaluunniit uagut kalaallit kalaaleqatigut tatinngippallaarpagut? Immaqa.

Imaassinjaavorluunniit uagut kalaallit eqqumiitsuliornermut isiginnittariaaserput ittangavallaalersimasoq, eqqumiitsuliornerlu kulturimuinnaq, sukisaarsaarutaannartullu suli isigalugu.

Ukiorparujussuarni eqqumiitsuliorneq oqallisigineqaleraangat oqaluttuartarsimavugut, sulilu oqaatigineqarluni qanoq kulturitsinnut pingaaruteqartiginersoq. Oqaatigineqartuartarpoq kinaassutsitsinnut, anersakkut, nukissanik tunioraasutut, inuunermet kusassaasutut qalipaasersuisutut, oqaluttuarisaanitsinnullu qanoq pingaaruteqartiginersoq.

Imaassinjaavormi eqqumiitsuliorneq kulturilerinertiunnaq isigisarsimagatsigu politikkikkut kingulliunneqartuarsimasoq, salliunneqassanani. Kulturimi tassaammat inuup nammineq pigisaa, anersakkut inooriaatsikkullu kingornussaa, politikkikkut iliuuseqarfinguminaatsoq, immaqaluunniit inuussutissarsiutiniit, sanaartornermiit, peqqinnissaqarfimmiit, aalisarnermiillu pingaaruteqannginnerusoq.

Soormi taava eqqumiitsuliorneq inuussutissarsiutitut isignerulerutsigu? Taamaaliornikkullu allatut inuussutissarsiutitut akileraartarnikkut, inatsisiornikkut, tapiisarnikkut, inoqatitsinnullu isiginnittariaatsikkut tulluarsaalersinnaassalluta.



Eqqumiitsuliortut akileraartarneq pillugu inatsisitigut inuussutissarsiuteqartutut tulluarsaaffigisuugutsigit aamma eqqumiitsuliortutut imminnut napatissinnaassusaat annertunerulissagaluarpoq. Soormiuna taava taamaaliorisimanngitsugut? Uteqqiinnassavara, immaqa inuussutissarsiutitut isigineqanngimmat, kulturilerinermuinnarlu tunngasutut suli isiginiarneqarluni.

Iluatsillugulu oqaatigerusunnarpoq, eqqumiitsuliortut kulturilerisutut taaneqartarnerat tulluanngitsoq. Oqaasermi kultur siammasippallaarujuussuarpoq, toqqaannarlu kulturip isumaa tassaalluni sunaluunniit inuup pilersitaa. Killormuuami tassaavoq pinngortitaq. Bakterie kultur eqqaassanngikkaanni. Taamaattorli ulluinnarni oqaraangatta kulturilerisut, amerlanertigut eqqumiitsuliortut eqqarsaatigisarpagut. Soormi eqqumiitsuliortutut taasarutsigit? Taava immaqa inuussutissarsiuteqartutut akuerinerulissagaluarpagut. Piorsarsimassusilerisutullu aamma taassallugit tulluanngilluinnarpoq, oqaaseq taanna inoriaatsimut tunnganerummat.

Sooq eqqartugassatut pingaartipparput? Eqqumiitsuliornikkut piginnaanilippassuaqaratta, inatsisitigullu tulluarsaanikkut inuussutissarsiuteqarsinnaanissaat annertusarusukkatsigu. Assersuutigalugu akiligassamik nassiussisinnaalersillugit. Allannguiiniaruttalu eqqumiitsuliortatsinnut isiginnittariaaserput aamma allanngortittariaqarparput, kulturilerisuinnartut isigiunnaarlugit, eqqumiitsuliornikkut inuussutissarsiuteqartutut aamma taasinnaanngorumallugit.

Ullumikkummi inuussutissarsiuteqartutut allatut akiligassamik nassiussisinnaatitaanngillat. Taamaallaallu sulianut ataasiakkaanut aningaasanik qinnuteqarsinnaatitaallutik. Ataavartumilli inuussutissarsiutitut perarfissiissagutta, akileraartarnikkut aaqqiissuteqarfigisariaqarpagut, tapiissutinillu tulluarsaaqqilluta.

Oqallissaarut maanna taamatut ammarpara. Ukiuni 40-ni eqqumiitsuliortortagut kulturilerisutut isigiuarsimasagut, politikkikkullu oqaasiinnakkut tapersorsorneqartuartarsimasut, immaqa inuussutissarsiutaasutut aamma taasinnaanngorutsigit pingartinneqarnerulissagaluararmata, kingulliunneqarpallaarunnaarlutillu.